

Beartas um Chlárúchán Ainmneacha Fearainn

SAINMHÍNITHE

Glactar sa Bheartas um Chlárúchán Ainmneacha Fearainn seo (an 'Beartas um Chlárúchán') leis na téarmaí a shainmhínítear sna Téarmaí agus Coinníollacha agus/nó sna Rialacha ADR.

AIDHM AGUS SCÓIP

Leagann an Beartas Clárúcháin seo amach na nósanna imeachta teicniúla agus riaracháin arna n-úsáid ag an gClárlann maidir le clárúchán Ainmneacha Fearainn, nó maidir le cealúchán, aistriú, fionraíocht, cúlghairm srl. na nAinmneacha Fearainn seo.

Ní bhaineann na téarmaí agus coinníollacha sa Bheartas Clárúcháin seo ach amháin le hAinmneacha Fearainn atá cláraithe go díreach faoin bhFearann Barrleibhéil 'eu' agus athróga .eu a d'fhéadfadh a bheith i scrípteanna eile.

Níl feidhm ag an mBeartas Clárúcháin seo maidir le hAinmneacha Fearainn atá cláraithe ag aon leibhéal íseal, nach bhfuil údarás ag an gClárlann orthu, mar is é an Cláraí a dhéanann na leibhéil seo a bhainistiú go heisiach.

ALT 1. CRITÉIR CHÁILITHEACHTA

Ní mór don Chláraí na Critéir Cháilitheachta seo a leanas a shásamh agus:

- (a) bheith ina shaoránach nó ina saoránach de chuid an Aontais Eorpaigh, na hÍoslainne, Lichtinstéin nó na hIorua, neamhspleách ar a n-áit chónaithe; nó
- (b) bheith ina dhuine nó ina duine nádúrtha nach saoránach de chuid an Aontais Eorpaigh, na hÍoslainne, Lichtinstéin nó na hIorua é nó í agus gur cónaitheoir i mBallstát de chuid an Aontais Eorpaigh, na hÍoslainne, Lichtinstéin nó na hIorua é nó í; nó
- (c) gnóthas atá bunaithe san Aontas Eorpach, san Íoslainn, i Lichtinstéin nó san Iorua; nó
- (d) eagraíocht atá bunaithe san Aontas Eorpach, san Íoslainn, i Lichtinstéin nó san Iorua gan dochar d'fheidhmiú an dlí náisiúnta.

Níl Cláraithe nach sásaíonn aon cheann de na Critéir Cháilitheachta thuas i dteideal Ainm Fearainn a chlárú.

Mura sásaíonn an Cláraí na coinníollacha thuas a thuilleadh, tá an Chlárlann i dteideal an tAinm Fearainn atá i gceist a chúlghairm ag am ar bith, de réir na dTéarmaí agus na gCoinníollacha.

ALT 2. AINM A ROGHNÚ – RIACHTANAI INFHAIGHTEACHTA AGUS THEICNIÚLA

Ní foláir don Chláraí, sula ndéanann sé nó sí Ainm Fearainn a chlárú, a fhíorú cibé acu an gcomhlíonann nó nach gcomhlíonann an tAinm Fearainn atá iarrtha na riachtanais infhaighteachta agus theicniúla a leagtar amach in alt 2.2 de na Téarmaí agus Coinníollacha. Maidir leis seo, ní foláir don Chláraí na céimeanna seo a leanas a ghlacadh

- a) seiceáil cibé acu an gcomhlíonann nó nach gcomhlíonann an tAinm Fearainn arna iarraidh na riachtanais theicniúla atá leagtha amach in alt 2.2 b) de na Téarmaí agus Coinníollacha;
- b) seiceáil sa WHOIS gréasánbhunaithe (ar fáil ar Láithreán Gréasáin na Clárlainne) cibé acu an bhfuil nó nach bhfuil an tAinm Fearainn ar fáil. Níl Ainmneacha Fearainn atá sna liostaí d'ainmneacha bactha nó forchoimeáda (foilsithe ar Láithreán Gréasáin na Clárlainne) ar fáil (go fóill) le haghaidh Clárúcháin.

ALT 3. CLÁRAITHEOIR A ROGHNÚ

Ní féidir Ainmneacha Fearainn a chlárú nó a athnuachan leis an gClárlann ach amháin trí Chláraitheoir, a ghníomhaíonn thar ceann an Chláraí.

Dá bhrí sin, chun Ainm Fearainn a chlárú, ba cheart don Chláraí Cláraitheoir a roghnú atá creidiúnaithe ag an gClárlann ón liosta atá ar fáil ar Láithreán Gréasáin na Clárlainne.

ALT 4. NA RIALACHA A LÉAMH

Agus Ainm Fearainn á chlárú, déanann an Cláraí comhaontú leis an gClárlann; tá na téarmaí agus na coinníollacha a bhaineann leis an gcomhaontú sin sna Rialacha. Ón nóiméad sin amach, beidh an Cláraí faoi cheangal go heisiach ag na Rialacha seo, agus féadfar iad a bheith faoi réir athraithe ag am ar bith de réir na nósanna imeachta atá leagtha amach sa Bheartas Clárúcháin seo.

Is ar an gCláraitheoir atá an fhreagracht na Rialacha infheidhme a chur ar fáil don Chláraí sula ndéanann sé a Ainm Fearainn a chlárú.

Tá na Téarmaí agus Coinníollacha agus gach Riail eile a bhfuil feidhm acu faoi láthair ar fáil ar Láithreán Gréasáin na Clárlainne.

Tabhair faoi deara go bhfuil an Chlárlann i dteideal Ainm Fearainn a chúlghairm dá deoin féin i gcás go sáraíonn an Cláraí na Rialacha.

ALT 5. FAISNÉIS TEAGMHÁLA ATÁ CRUINN AGUS IOMLÁN A CHUR AR FÁIL

Ní mheasfar go mbeidh clárúchán Ainm Fearainn comhlánaithe ach amháin nuair a chuireann an Cláraí, trí Chláraitheoir, an fhaisnéis seo a leanas, ar a laghad, ar fáil don Chlárlann:

- a) Ainm iomlán an Chláraí. I gcás nach sonraítear aon ainm gnóthais nó eagraíochta, measfar gurb é an Cláraí an duine aonair a iarrann an tAinm Fearainn a chlárú; má shonraítear ainm an ghnóthais nó na heagraíochta, measfar gurb é an Cláraí an gnóthas nó an eagraíocht;
- b) Seoladh iomlán an Chláraí;
- c) Léiriú ar thír shaoránachta i gcás saoránach de chuid an Aontais Eorpaigh, na hÍoslainne, Lichtinstéin nó na hIorua nach bhfuil cónaí orthu i mBallstát de chuid an Aontais Eorpaigh, san Íoslainn, i Lichtinstéin nó san Iorua;
- d) Seoladh ríomhphoist an Chláraí (nó a n-ionadaí);
- e) An uimhir theileafóin ar féidir teagmháil a dhéanamh leis an gCláraí (nó lena ionadaí) uirthi;
- f) An tAinm Fearainn atá iarrtha;
- g) An teanga do nósanna imeachta ADR, dá dtagraítear i Mír 3(a) de Rialacha ADR, é a bheith mar theanga an chomhaontais clárúcháin idir an Cláraí agus an Cláraitheoir i gcomhréir leis na rialacha.

Tá oibleagáid ar an gCláraí an fhaisnéis thuasluaite a choinneáil go hiomlán agus go cruinn i gcónaí le linn an Téarma Clárúcháin (féach Alt 8 maidir le leasú ar fhaisnéis teagmhála).

Tá an Chlárlann i dteideal Ainm Fearainn a chúlghairm a bhfuil an Cláraí tar éis faisnéis neamhiomlán nó neamhchruinn a chur ar fáil ina leith.

Tá an Chlárlann i dteideal tuilleadh faisnéise a iarraidh ar an gCláraí (go díreach nó trí Chláraitheoir an Chláraí).

Ní mór don Chláraí seoladh ríomhphoist atá ag feidhmiú a chur ar fáil, chun glacadh le cumarsáid a d'fhéadfadh teacht ón gClárlann agus/nó ón Soláthraí ADR. Mura bhfuil an seoladh ríomhphoist a thugtar don Chlárlann ag feidhmiú, tá an Chlárlann i dteideal an tAinm

Fearainn a chúlghairm de réir an nós imeachta dá dtagraítear in alt 12 den Bheartas Clárúcháin seo.

Ní mór go mbainfeadh an fhaisnéis leis an gCláraí agus ní leis an gCláraitheoir, an seachfhreastalaí ná ionadaí duine nó aonáin nach gcomhlíonann na Critéir Cháilitheachta.

ALT 6. AINM FEARAINN A CHLÁRÚ

Ní féidir Ainmneacha Fearainn a chlárú leis an gClárlann ach amháin trí Chláraitheoir atá creidiúnaithe ag an gClárlann. Is dóchúil go ngearrfaidh an Cláraitheoir táille ar an tseirbhís sin. Ní féidir iarraidh ar Ainm Fearainn a dhéanamh go díreach chuig an gClárlann.

Ar choinníoll gur chuir an Cláraí an fhaisnéis riachtanach ar fad ar fáil don Chláraitheoir agus go bhfuil aon oibleagáidí agus na hoibleagáidí ábhartha eile go léir comhlíonta aige nó aici, is é freagracht an Chláraitheora an fhaisnéis sin a chur isteach go díreach i gcóras na Clárlainne de réir na nósanna imeachta teicniúla arna mbunú ag an gClárlann agus arna bhforáil don Chláraitheoir.

Má tá an tAinm Fearainn atá iarrtha ar fáil go fóill agus má tá an fhaisnéis comhlánaithe, déanfar an tAinm Fearainn a chlárú go huathoibríoch le haghaidh Téarma (in-athnuaite), faoi mar atá cur síos air sna Téarmaí agus Coinníollacha agus faoi réir na bhforálacha atá leagtha amach iontu sin.

Ní féidir botún litrithe a cheartú san Ainm Fearainn féin: Is é clárúchán an Ainm Fearainn atá ceart an t-aon réiteach ar an gceist réamhluaite.

ALT 7. WHOIS GRÉASÁNBHUNAITHE

Éilíonn na Rialacha go gcuirfeadh an Chlárlann WHOIS gréasánbhunaithe ar fáil. Tá tuilleadh sonraí maidir le cuspóir agus faisnéis a fhoilsítear sa WHOIS gréasánbhunaithe, chomh maith le mí-úsáid a chosc, nochtadh sonraí pearsanta, agus an rochtain ar an WHOIS gréasánbhunaithe ag lucht lagamhairc, leagtha amach sa Bheartas WHOIS, atá ar fáil ar Láithreán Gréasáin na Clárlainne.

ALT 8. AN NÓS IMEACHTA LE SONRAÍ TEAGMHÁLA A LEASÚ

Má athraíonn na sonraí teagmhála don Chláraí, ní mór don Chláraí iarraidh ar an gCláraitheoir/na Cláraitheoirí an fhaisnéis sin a leasú leis an gClárlann laistigh de mhí amháin (1) tar éis athrú den sórt sin. Ní féidir iarratas den sórt sin a dhéanamh go díreach leis an gClárlann.

ALT 9. AN NÓS IMEACHTA MAIDIR LE TÉARMA AINM FEARAINN A ATHNUACHAN, A CHUR AR CEAL, NÓ A SHÍNEADH

I bprionsabal, agus faoi réir na bhforálacha atá leagtha amach sna Téarmaí agus Coinníollacha, déantar Téarma Ainm Fearainn cláraithe a athnuachan go huathoibríoch le haghaidh tréimhsí leantacha d'aon bhliain amháin (1).

Tá an Cláraí i dteideal clárúchán Ainm Fearainn a chealú trí iarratas a dhéanamh lena gCláraitheoir; is é an Cláraitheoir an t-aon aonán ar féidir leis iarraidh ar chealú a dhéanamh leis an gClárlann. Ní féidir le Cláraí iarraidh ar chealú a dhéanamh go díreach leis an gClárlann.

D'fhéadfadh difríocht a bheith sna nósanna imeachta a úsáideann Cláraitheoirí le Téarma Ainmneacha Fearainn a athnuachan, a chealú, nó a shíneadh. Dá bhrí sin, molann EURid go léifeadh an Cláraí go cúramach na téarmaí agus coinníollacha atá leagtha amach ag an

gCláraitheoir roghnaithe. I gcásanna áirithe, déanfaidh an Cláraitheoir Téarma Ainm Fearainn a chealú, a athnuachan, nó a shíneadh má chomhlíontar coinníollacha áirithe.

Mura bhfuil i gceist ag an gCláraitheoir an tAinm Fearainn a athnuachan nuair a rachaidh an Téarma in éag, tá sé tábhachtach go gcuirfí an Cláraitheoir ar an eolas faoi sin in am cuí agus i gcónaí de réir an chomhaontaithe idir an Cláraitheoir agus an Cláraí. Má tá an dáta éaga le hAinm Fearainn a chlárú caite, déanfaidh an Chlárlann sonrasc a chur chuig an gCláraitheoir go huathoibríoch do Théarma nua bliana. Sa chás sin, is dócha go ngearrfaidh an Cláraitheoir an táille athnuachana ar an gCláraí.

Tá a théarmaí agus coinníollacha sonrasctha féin ag gach Cláraitheoir. Bíonn Cláraitheoirí éagsúla ag súil go n-íocfadh an Cláraí aon sonrasc atá gan íoc sula dtéann a nAinm Fearainn in éag, ionas go mbeadh a fhios acu cibé acu ar cheart an clárúchán a athnuachan nó nár cheart. Tabhair do d'aire le do thoil nach ndéanfaidh an Chlárlann idirghabháil in aon díospóid idir Cláraitheoir agus a chustaiméirí.

ALT 10. NÓS IMEACHTA I GCOMHAIR AISTRÍÚ

10.1 Aistriú Ainm Fearainn Chuig Cláraitheoir creidiúnaithe eile

Faoi réir Alt 8 de na Téarmaí agus Coinníollacha, tá sé de cheart ag an gCláraí an tAinm Fearainn a aistriú chuig Cláraitheoir eile de réir an nós imeachta atá leagtha amach thíos.

Ar iarratas ón gCláraitheoir chun an tAinm Fearainn a aistriú chuig Cláraitheoir creidiúnaithe eile, iarrfaidh an Cláraitheoir reatha cód údaraithe uathúil d'aistriú ón gClárlann. Tar éis don Chlárlann cód údaraithe sin a chur ar fáil don Chláraitheoir, ina dhiaidh sin, (i) cuirfidh an Cláraitheoir an cód údaraithe ar fáil don Cláraí, (ii) cuirfidh an Cláraí an cód údaraithe ar fáil don Chláraitheoir nua agus (iii) cuirfidh an Cláraitheoir nua an cód údaraithe ar fáil don Chlárlann tríd an idirbheart cuí.

Déanfaidh an Chlárlann an t-aistriú a chomhlíonadh tar éis don Chlárlann an cód údaraithe a fháil de réir (iii) thuas.

Tríd an nós imeachta seo a leanúint, aithníonn agus barántaíonn na Cláraitheoirí agus an Cláraí atá bainteach leis bailíocht aistriú an Ainm Fearainn chuig an gCláraitheoir creidiúnaithe nua.

Má fhoirceannantar an comhaontú idir an Chlárlann agus an Cláraitheoir atá ceaptha ag an gCláraí agus mura bhfuil an punann Ainm Fearainn aistriithe ag an gCláraitheoir chuig Cláraitheoir eile, cuirfidh an Chlárlann an Cláraí ar an eolas faoi sin. Caitheadh an Cláraí Cláraitheoir nua a roghnú roimh dheireadh an Téarma. Ag deireadh an Téarma, cuirfear an tAinm Fearainn ar fionraí.

10.2 Aistriú Ainm Fearainn chuig Cláraí nua

Faoi réir Alt 8 de na Téarmaí agus Coinníollacha, tá sé de cheart ag an gCláraí an tAinm Fearainn a aistriú chuig Cláraí eile de réir na nósanna imeachta atá leagtha amach thíos.

Ar iarraidh ón gCláraí an tAinm Fearainn a aistriú chuig Cláraí nua, iarrfaidh an Cláraitheoir reatha cód údaraithe uathúil d'aistriú ón gClárlann. Tar éis don Chlárlann an cód údaraithe sin a chur ar fáil don Chláraitheoir, ina dhiaidh sin, (i) cuirfidh an Cláraitheoir ar fáil don Cláraí atá ag aistriú é, (ii) cuirfidh an Cláraí atá ag aistriú ar fáil don Chlárlann é, (iii) cuirfidh an Cláraí nua ar fáil don Chláraitheoir (reatha nó nua) é agus (iv) cuirfidh an Cláraitheoir (reatha nó nua) ar fáil don Chlárlann é tríd an idirbheart cuí.

Déanfaidh an Chlárlann an t-aistriú a chomhlíonadh tar éis don Chlárlann an cód údaraithe a fháil de réir (iv) thuas.

Tríd an nós imeachta seo a leanúint, aithníonn agus barántaíonn na Cláraitheoirí agus na Cláraitheoir atá bainteach leis bailíocht aistriú an Ainm Fearainn chuig an gCláraí nua.

Má tharlaíonn sé le linn an Téarma, nach ann don Chláraí a thuilleadh, go bhfuil sé faoi réir imeachtaí dócmhainneachta, foirceanta, scor trádála, féimheachta nó a leithéidí, féadfaidh na hoidhrí dlíthiúla nó an riarthóir atá ceaptha go dleathach a iarraidh go ndéanfaí an tAinm Fearainn a aistriú de réir Alt 7 de na Téarmaí agus Coinníollacha.

10.3 Nuashonrú Faisnéise

Más mian le Cláraí an tAinm Fearainn a aistriú chuig Cláraí nua, chomh fada agus nach n-athraíonn an Cláraitheoir de bhun aistrithe den sórt sin, tá sé de cheart ag an gCláraitheoir (de bhreis ar an nós imeachta atá leagtha amach in Alt 10.2 thuas) faisnéis Chláraí an Ainm Fearainn a nuashonrú chuig ceann an Chláraí nua. Chun amhras a sheachaint, ní bheidh aon chód údaraithe de dhíth do nuashonrú den chineál sin.

Tríd an nós imeachta seo a leanúint, aithníonn agus barántaíonn an Cláraitheoir agus na Cláraithe atá bainteach leis bailíocht aistriú an Ainm Fearainn chuig an gCláraí nua.

ALT 11. AINMNEACHA FEARAINN A CHUR AR FIONRAÍ AGUS AN NÓS IMEACHTA LE HAGHAIDH ATHNUACHANA

1. Má fhaigheann an Chlárlann iarratas ar chealú ón gCláraí de bhun Alt 6.2 de na Téarmaí agus Coinníollacha agus Alt 9 den Bheartas Clárúcháin seo, cuirfidh sí an tAinm Fearainn atá i gceist ar fionraí láithreach ar feadh tréimhse daichead lá féilire (40) tar éis (i) an dáta atá luaite san iarraidh ar chealú nó (ii) an dáta ar a ndearnadh an iarraidh ar chealú má tá sé níos déanaí ná an dáta a luadh san iarraidh ar chealú, nó mura luadh aon dáta san iarraidh ar chealú.

Laistigh den tréimhse 40 lá seo:

- (i) Féadfaidh an Cláraí a iarraidh go ndéanfadh a gCláraitheoir an tAinm Fearainn atá ar fionraí a athghníomhachtú, agus cuirfidh an Cláraitheoir a leithéid d'iarraidh in iúl don Chlárlann.
I bprionsabal, ní athraíonn athghníomhachtú Ainm Fearainn an dáta clárúcháin ná cothrom lae an dáta clárúcháin, ach cuireann sé bliain eile leis an téarma, faoi réir na bhforálacha atá leagtha amach sna Téarmaí agus Coinníollacha.
- (ii) féadfaidh an Cláraí aistriú an Ainm Fearainn a iarraidh (lena bhfuil athghníomhachtú an Ainm Fearainn intuigthe).

Ina theannta sin, le linn na tréimhse fionraíochta réamhluaithe, féadfaidh seiceadóir eastát an Chláraitheora nó a n-oidhrí dlíthiúla (i gcás go n-éagfaidh an Cláraitheoir) nó an riarthóir a cheapfar de réir dlí (i gcás go bhfoirceantar an Cláraí), d'ainneoin an tAinm Fearainn a chur ar fionraí, iarratas a dhéanamh ar an ainm a aistriú trí Chláraitheoir tráth an doiciméadú iomchuí dá dtagraítear in Alt 10 den Bheartas Clárúcháin seo a bheith curtha isteach.

Mura ndéantar é a athghníomhachtú ná é a aistriú amhail dá dtagraítear thuas laistigh den tréimhse 40 lá sonraithe, nó mura bhfaigheann an Chlárlann na táillí iomchuí, cuirfidh sí an tAinm Fearainn atá i gceist ar fáil do chlárúchán ginearálta. Ní chúiteofar na táillí a íocadh as clárúchán tosaigh an Ainm Fearainn (ná a athnuachan).

2. Má fhionraíonn an Chlárlann Ainm Fearainn ar an gcomhaontú idir an Chlárlann agus an Cláraí a fhoirceannadh, beidh feidhm ag an nós imeachta dá bhforáiltear in alt 11.1 den Bheartas Clárúcháin seo.

ALT 12. AN NÓS IMEACHTA LE HAINMNEACHA FEARAINN A CHÚLGHAIRM

1. Féadfaidh an Chlárlann, dá rogha féin, Ainm Fearainn a chúlghairm ar na forais seo a leanas amháin go heisiach:
 - (i) Fiacha gan íoc a bheidh dlite ag an gCláraitheoir don Chlárlann;
 - (ii) Neamhchomhlíonadh na gCritéar Cáilitheachta dá bhforáiltear faoi airteagal 4(2)(b) den Rialachán (CE) 733/2002 agus airteagal 20 i gcomhar le hairteagal 22 de Rialachán (AE) 2019/517;
 - (iii) Aon sárú a bheidh déanta ag an gCláraitheoir ar na Rialacha.

2. Sula ndéanfaidh sí an tAinm Fearainn a chúlghairm, tabharfaidh an Chlárlann fógra don Chláraí agus/nó don Chláraitheoir trínar cláraíodh an tAinm Fearainn trí r-phost, chun deis a thabhairt don Chláraitheoir agus/nó don Chláraí, más féidir, na forais chúlghairme réamhluaithe a leigheas.
Mura ndéantar na forais chúlghairme réamhluaithe a leigheas in am tráth, beidh an Chlárlann i dteideal an tAinm Fearainn a chúlghairm.
3. Ón am a dtugann an Chlárlann fógra don Chláraí agus/nó don Chláraitheoir de réir alt 12.2, féadfaidh sí an tAinm Fearainn/na hAinmneacha Fearainn lena mbaineann a chur ar fionraí. Ní féidir Ainmneacha Fearainn a cuireadh ar fionraí de réir Alt 12.3 anseo a aistriú nó a athghníomhachtú.